

曹大理集

石倉詩稿

金陵集中

甲辰

乙巳

閩中曹學佺著

白下胡宗仁

新安王野閱

到金陵社集葉循父園賦荅

相見江湖外何如丘壑前  
停車黃葉雨把酒白  
門烟行路幾千里住山纔一年  
依然詢舊好各  
爲出新篇

秋詠四首

壁間蛩

吟動生寒後情繁入夜初欲分匡鑿火似讀孔  
遺書窻度金梭裏壺催玉漏餘家貧聞最徹唯  
有馬相如

燈前雁

玉塞鴻飛急銀缸夜色闌將沉幾重焰纔得一  
聲寒戍婦縫衣泣羈人出戶看孰知玄景逝流  
響自漫漫

水上楓

楓樹蕭森候那堪傍水涯  
芊綿雲裏燒搖曳鏡  
中花句得吳江冷愁隨郢路賒  
曉霜猶不覺祇  
訝夕陽斜

霜中月

正當天駟見却值海蟾生  
雖是一般色祇應多  
數聲合歡扇逾淨照膽鏡偏明  
最恨烏啼急能  
令鴛夢驚

宿石頭菴

經秋成慘思入夜始玄言  
霜白先微月鐘清乍

嘯猿澗流應閉葉山雨未開門明日疎林外能  
禁覽眺繁

看菊詩

有序

按崔寔月令云九月九日采菊然是時紫蘂  
雖舒黃花未吐欲徵其盛則在秋冬之交夫  
應節則不芳而入冬則少韻矣今年予到金  
陵乃有閏九月重陽之名可愛不厭其繁菊  
花之實可采並逞其豔是于月則爲閏于色  
則爲正也予肩輿日往諸好事家過看秋色

盈眸金杯在手花旣成品品亦成詩因取去年在家所作錄爲一帙以娛閒曠夫合兩年之致則旅人之情見矣屬九日之辰故以登高之事終焉

早行初見負菊者

早行無所見負菊有衰翁暫離園坳裏猶然霧露中

過吳隱君宅見有新菊木芙蓉花

閉戶已寒序新衣方復加木蓮與秋菊總是拒

霜花剡縣去年客茂陵多病家海邊同宿鴈將  
有一行斜

齊王孫菊

王孫失芳草相對此寒英一入吳宮裏秋霜猶  
自驚詎符陶令旨應識楚騷情余本長歌客持  
杯泪已盈

客有饋菊者戲荅二絕

一官聊自寄世事不相聞且論秋色好亦待故  
人分

冷暑淡無物如過秋水邊日應司花使猶然損  
俸錢

子夜秋歌三首

爲懽湏及時莫使三春過菊花雖自媚終覺瘁  
容多

幸以雲漢影鑒此金翠飾欲將微物綴秋光亦  
何極

寧爲野草萎得願與燐連莫作黃菊榮惡說生  
籬邊

霜降日胡彭舉林茂之過小齋看菊分得  
秋英二字

以君分我菊君亦更來遊枝雜偏諳舊門閒不  
礙幽日陰纔素節霜落是深秋若不尋佳事翻  
爲相對愁

青山行處伴黃菊醉時并臨水拂圓影隨風餐  
落英在家爲客日今歲去年情與爾興不淺悠  
然思友生

馬水部菊

晦日看

水部宅邊曠寒花霜後開鬱金香掩映黃鵠語  
徘徊何遜移詩興陶公戀酒杯晚姿應未盡秋  
色故重來

余中臺菊

天台人

軒冕無俗韻何必農圃家余公性愛菊奇種罔  
不羅培植盡厥法既精尤能多綠葉垂綺障黃  
華流金波雖曰几席玩亦在山之阿山阿信佇  
立纏綿皆薜蘿易素乃爲絢視遠良有加不知  
法署霜宛若赤城霞餐此獲眈夕延年以蠲疴

董九博士菊

有花自可入有酒況堪把想君飛來鵲爲我繫  
去馬惟失高樓居日臥東籬下叢中信凌亂不  
辨爲何者世人好脩飾之子尚其野譬如千南  
金不就良工冶陶公頽然時此意良可寫

寄唐君公

雲間人

吳會秋風起終朝天氣清但携黃菊醞何似紫  
萸萸作宦不稱意在家無所營三山日佇望一  
水自盈盈

舊內菊

天中舒菊藥戶外置丘巒石巧微通影臺高易  
受寒恍然承玉露正在此金盤亦有相如渴還  
來就一餐

梔葉渡待菊不至

香氣自不遠流波也可酣孰知梔葉渡併是菊  
花潭坐對幽人酌簾窺少女簪俱言秋色媚別  
有在城南

梅子馬至

待菊反不至無期之子來兩值登高節猶能共  
一迴

翁比部菊

任滿北上

何日是瓜期重陽采菊時坐於黃葉下映此白  
雲司客子任來往主人當別離雖然之北闕還  
只戀東籬

冶城時道士菊

層樓冶城曲秋菊閉門陰何處入塵俗斯能諧  
素心黃庭堪共寶故劍或餘金少露鍾山色况

聞清磬音

張林宗到看菊

訪我復今日思君秋欲終看成鴻雁序就此菊  
花叢雖自香中過應知色卽空于焉達禪理在  
昔有陶公

詠同心菊

惟有此同心悠然不斷金所思惟悴日相見也  
難禁

胡道士晚菊

散步過深院閒消飽飯餘松花寒亦歛菊蕊晚  
仍舒綽約憐姬態清幽映道書盧家雖得似脂  
粉也應除

閏九月九日燕子磯登高共用寒字

今日重陽江上看何如前度在長干須知嘉會  
難重過祇覺秋衣一倍寒燕子磯頭終不去鴈  
鴻關外已應殘天涯極目猶難徧未得憑風借  
羽翰

嘉善寺

蒼烟人跡外黃葉寺門前  
閏月重陽節雙嵯一  
線天僧寮自岑寂洞壑復幽偏  
若待樓成夜還應就此眠

幕府山

晉家南渡日開府曰其間試酌梅花水  
還臨直瀆山清鐘禪寺遠夕照墓門閒  
今古長江外茫  
茫去不還

牛首夜坐

寒山殊有趣夜坐益相親  
雙樹不分月一枝堪

映人雲梯元峻絕天闕自嶙峋不覺蓮花漏悠然已及晨

幽棲寺

昔日禪棲地重來信覺幽林中層壑積門外大江流山月屢移宿谷風先別愁明朝獻花路相望是崑頭

同諸子宿郭聖胎山房

山房雪意動颯颯竹風鳴坐此夜方盡起看天復晴義因譚處密詩入籟中清唯有朋來樂能

忘畱滯情

夢鄧汝高

夜深吳苑夢獨切楚臣魂語笑宛如昨亭臺依舊存清霜覆餘柳明月照孤猿坐此傷離緒唯添雙淚痕

送陳志玄謁選

中都人

一官猶足寄三泣亦何爲但識濠梁樂寧論楚璞悲青尊對雨別黃綬隔花垂倘就荆卿飲應逢高漸離

送施僉憲之滇

持節滇中去悠悠天一涯四時芳草色千古碧  
雞祠洱水華簪落蒼山彩筆垂須令王化洽長  
繫遠人思

謝公墩

謝公墩上日閒行四野霜天一倍明亭館已空  
雲物麗寺門相近夕鐘清寒山又傍斜陽路江  
水終銷十月聲載妓如花不同賞風流應感古  
今情

送甯民部北上

漢庭盡道田郎美，衛國寧過武子愚。  
睹奕漫羸安石墅，分司多在莫愁湖。  
日南荏苒陽生候，天北馳驅雪載途。  
若領帝城春色早，肯沾餘照及凋枯。

早起眺鍾山微雪

登樓初日遲，却望鍾山陲。  
昨夜有微雪，人家俱不知。  
白雲迷欲盡，翠黛雜相窺。  
漠漠寒光外，唯應早入詩。

新雪二首

今日始看雪雪非今日飛山中前幾夜早起有  
餘輝愁動饑鳥翼欣承吟客衣故鄉離歲月乍  
識物情違

暮雪轉蕭蕭危欄獨擁貂坐於一樓上對此衆  
山遙戍析交寒路溪燈映斷橋况堪初月色相  
接是明朝

冶城眺晴雪六韻

高閣臨山盡晴光望次凜雲垂鍾阜沒雪傍冶

城銷鳳闕祥先集，鵬絃潤始調。千林疑敗絮，萬瓦似歸潮。映日翻成采，隨風若更飄。應知今夜月，氣韻坐相要。

贈黃隱士

酌彼中山酒，息茲漢陰機。孤雲行澗藥，野鹿獻春薇。雪入丹爐薄，陽生葭管微。行藏應早計，不必更知非。

王太古新居看秦淮積雪

剡中安道宅，雪後子猷過。雖傷城南少，應生曲

裏多月明雜花樹鶴宿共烟蘿幾日青山色迢迢更渡河

蠟梅歌調吳非熊

去歲尋梅越山曲寂寂梅花覆幽屋一羣鳥宿苔痕紫幾尺蘿垂潭水綠君道秦淮有女郎垂簾開卷靜臨窻生來獨立真無比移到梅花許作雙梅花盈盈嬌欲絕持比玉顏還更別不知桃葉在流波何似梅花影迴雪當時有意屬靈犀當時無地覓芳閨但逢夜月朦朧色便作寒

猿斷續啼繡帶曾分長命縷雕欄屢夢長橋路  
單眠思殺鴛鴦鳥百計纔成連理樹昔年種樹  
今年開阿閣花開見蠟梅爲言白雪不相妬會  
有東風密作媒明知此物不結子情濃此際無  
窮已葉似芙蓉生木末香奪幽蘭藏谷裏野雀  
無端繞畫梁狂蜂祇戀故巢芳眉間聚態千金  
咲額上安黃一樣妝君不見落梅一曲那堪鼓  
隴頭折寄傷離苦續弦勝取鳳洲膠緘書不用  
黎陽土漫道枝頭落有三春風猶自隔江南莫

因口嚼終無味始悔從前心太甘

陳元愷署中看殘雪東胡彭舉

千古鍾山色朝來若更新忽看松上雪已入草  
間春煮却分泉味凝將雜路塵袁安尚高臥烟  
火絕西隣

清涼臺看積雪喜臧晉叔至

清涼臺自迴况復此時心不到青山裏焉知白  
雪深徑舍修竹潤日落遠江陰却喜子猷興扁  
舟能一尋

太平堤遇雪

長堤逢雨雪淒絕少人行  
自顧貂裘敝誰披鶴  
氈明波連後湖水氣壓古臺城况有北門歎  
悠傷世情

再登寓樓看雪二首

疲馬雪中寒長歌行路難  
歸來問妻子寧似昔  
時懽肯厭萊蕪甌虛彈  
貢禹冠平生愛清絕更  
許上樓看

祇問尚玄室誰知生白虛  
雪深幾尺後事絕一

旬餘近岼連江迴繁花映樹疎悠悠度殘臙春色莫躊躇

永慶寺竹園看雪

搖搖林影外雪滿夕陽前此地無人到來看尚  
宛然翠深俱在嶺寒極不生烟欲問茲心境唯  
應一喻禪

雪後登綺霞閣卽目

綺閣霞光上名都夕照間雲開江浦驛雪隱秣  
陵關臙鼓人家競梅花客思閒畱連今夜酌應

接早春還

桃葉渡看雪賦得寒閨

以此渡頭雪遙想閨中心豈無同袍者遺怨在  
錦衾此時有愁思玉漏若爲深

雪後經華林園

雪後到華林天寒曠復深幾時芳草色終媿白  
頭吟路指行人出名隨逝水沉已無魚鳥樂何  
以會予心

和張林宗詠立春幢勝

綵勝邀春麗青旛迓氣專欲知裁燕早但覩策  
牛前縑自司徒賜書應太史傳雲翹纔叶舞雪  
調乍歸絃北斗杓先指東風勢屢旋還疑百花  
發身入洛陽天

除夕雷雨

旅人愁度歲震氣憤成雷夜思兩年合春聲羣  
動該山川縣理詠朋侶罷銜杯惟有鄉園夢猶  
能密往來

乙巳元旦

獻歲端居暇鍾山覆屋寒仙萸開雨裏官柳長  
河子志謝任公子才違司馬安所忻佳麗地詎  
作寂寥看

初三日吳聖初樓上看雪

密爾堪乘興相從不待招登樓踰百尺入歲始  
三朝樹影寒山沒江容霽岼遙欲知春雪薄都  
向酒中消

人日遊靈谷寺

人日晴光麗首春春光今日喚遊人乍見梅花

吐生意况復松下無風塵景陽鐘鳴空谷響功  
德水示迷途津翠靄已須畱客宿黃昏何事逐  
歸輪

宿靈谷山房

去年人日猶堪憶清歌豔舞歡何極今年人日  
景蕭疎松房石榻聊棲息梅花一枝短牆裏夜  
雨深更半山側故園此去無前期客夢不成坐  
曉色

元夕過桃葉渡同諸子飲

桃葉渡頭歌管催春月乍滿潮水來秦淮一派  
金波湧鍾嶺千層玉蕊開我來就君君莫詫金  
陵閒殺上元夜白雪全凋火樹花綵雲已斷鰲  
山駕往事繁華休復論官家空有舊名存明朝  
入署謝燈假猶勝他人未出門

西天寺遇王季重

長干浮圖七寶堆層層相映雨花臺神僧舊向  
西天去仙令新從句曲來丹陽城邊多古樹六  
載不知行此路且如今日登高樓猶是昨宵未

到處

春分後見雪

二月春分百花晝莫信春前雪居後乍看簾隙  
度成絲已向檐端垂作溜春衣未許試輕羅谷  
口嬌鶯猶怯歌桺李芳菲應有待河干弱柳奈  
君何

雨中過柳陳父看杏花陳父時有攜李之  
遊

君家住近瓦官寺金陵城中最僻地向來名作

杏花村花開始有遊人至此時結伴過君家歲  
歲年年成故事花枝雖不用錢買濁酒應賒爲  
客醉客醉看花倒接籬却因微雨踏成泥枝頭  
莫惜終零落明日東君渡浙西

采茶歌爲方子公

君不見西山二子歌采薇虞夏已沒將安歸又  
不見魯國孔父傷猗蘭棲棲不遇空長歎古來  
賢聖尚如此况復今時布衣子譚咲何能取世  
資拂衣且自歸家裏家在松蘿山一隅松蘿山

茗及春敷紫筍不論明月峽玄膏豈讓岳陽湖  
君行采采動盈掬春鶯啼兮芳草綠空翠日迷  
香霧中新烟乍試幽泉曲絕勝秦精入武昌漫  
隨老姥鬻維揚相逢應不厭水厄有客清談日  
夜長

兩山詩爲焦弱侯太史

嵬峩雞籠山遶遶石頭城形勢稱天險佳麗表  
神京雷館與星屬謝墩入雲平瞰湖抱秀氣矚  
江來虛明環遶青溪渚相望白下亭時代旣遷

易賢哲畱其名太史乃興起心迹與之并門徒  
席云滿蒼生望匪輕胡蒙絳灌忌遂遺廣受榮  
藏書類班嗣臥遊追宗生支遁已買山郗公乏  
經營企石以代戶撫松似扶楹儵忽雲霞變居  
諸日月征滔滔傷今志悠悠懷古情陋彼偏安  
業叶茲夢卜靈翹首黃帝駕空同問廣成

送陳德遠

白門來最久吾子是深知但有寸心在非無相  
別時春寒猶積雪楊柳未盈枝願入東風勝啼

鷺日見思

送張我先

我已傷畱滯君非易別離且當寒食住何事暮  
舟移家傍延陵子人同張釋之明朝楊柳樹獨  
憶向南枝

送洪仲韋之新安

爲客經年久閒遊任此身渡頭桃葉暗柳外板  
橋新采石過賢令黃山問主人知君有歸夢祇  
向秣陵春

清明日桃花塢遲主人尹武部不至

我興在行樂聞召疾如馳不知司馬法乃負虞  
人期高岡自連屬其下亦成谿正當艷陽日桃  
李競芳菲花葉自相對遊侶勞參差壺樽豈不  
盛而顧主人非莫與公榮飲誰問淵明饑清晨  
已出門日暮方來歸家人亟授餐問我何所之  
聊因語之故大咲云我痴寄語爲客人已後當  
見幾

送姚廷尉之聊城

三月清和候。鵲花水曲分。蘭亭脩禊事。棘寺歎  
離羣。淇竹家林過。虞絃祖廟聞。魯連高蹈跡。東  
海有浮雲。

送徐吏部還樵李

新亭此送別。風日喜偏清。信逐桃花水。言歸樵  
李城。名園依靜鳥。三徑惜飛英。倘就山公宿。還  
深向子情。

送陳虞部還閩

上巳當行樂。離辰黯自傷。海雲收鐵甕。江月待

錢塘芳草憐袍色幽蘭敵署香客程春欲盡猶  
喜及家鄉

送李民部之睢陽

聞說睢陽地黃河向此分逍遙漆園吏淒切木  
蘭軍樹指仙人姓園畱詞客文所懷多古跡一  
一問浮雲

送陳脩齡之滁陽

問君何所去滁邑亂山中別路斜陽盡玄言幾  
夜終月明梅雨過溪轉竹陰通欲驗淮南術應

須訪八公

送羅司城之陝州

分陝周南地甘棠待使臣  
言辭建業水行看洛陽  
春峴谷山連楚函關路  
向秦繁華舊時事惟有  
度天津

送陸長康

夏日江初永窻虛水氣  
涵綠楊垂欲盡紅藥戰  
猶酣新月行時遠涼風  
到自南湖應連越鳥市  
已放吳蠶朋侶要同好  
湖山歷舊探須憐翡翠

帶更惜鳳凰簪勿使秦淮上姬人思不堪

許伯倫招集秦淮夜汎十韻

秦淮新漲日春雪憶初消幾度添江雨經時拂  
柳條人家競臺榭戚里出笙簫獨立恒思汎無  
舟若待招許詢情復勝桃葉渡餘嬌波浪纔空  
濶峰巒信動搖雲光讓微月霞氣薄清霄遶郭  
疑迴棹縣燈識度橋樹深偏覺靜港狹不知遙  
未必山陰夜方云客興饒

端陽雨汎城南十韻

五月移舟去榴花兩岼紅浴蘭仍采艾令節信  
飄蓬赤石磯頭泊丹陽城外通枝寒應濯雨蘋  
亂乍過風竟日圭無影諸天塔正中山光低似  
積波色遠成空絲縷縈香閣蒲書掛竹叢江邊  
來獨鳥樹裏落雙虹屈子歌偏放田文客自雄  
漫云千古異唯有一尊同

送吳民部歸沔陽

青蓮居士誰與倫平生灑落無風塵郎官湖上  
新題句孫楚樓中舊酒人君今歸渡沔陽驛伊

予尚作金陵客可憐酒人遊者稀月在湖波幾  
圓缺與君平分一李白還似依依未相別多君  
意氣凌青雲使我相思歌白雪

題林子丘茂之兄弟新居

時予悼亡  
將乞假還

去年冶城雪中宿君家尚在冶城麓今歲華林  
芳草深移家相就到華林華林風物由來古千  
年魚鳥悲無主欲識當時會心處但寄文人口  
中語可憐花月幽相映彩雲忽散香奩鏡顧我  
方題悼逝篇聞君已就移居詠居在比隣共一

卷三  
二十  
藩唯君與我日相存謝傳幃中管絃絕翟尉門  
前鳥雀喧幾度花開還已過幾夜月明曾共坐  
荒原曉角旅魂驚隔寺疎鐘愁思破我往君來  
能幾時又復辭君當解維秋風分作飄蓬客祇  
畱餘跡長相思

題胡可復水閣

驅車來往桃葉渡渡頭歌管喧盈路金陵惟此  
行樂地可惜爲官不得住我官無事長日閒之  
子幽期坐此間橋上行人俱在水鏡裏嬌蛾別

有山幾行楊柳枝交蔭五嶽峰巒圖可枕雲散  
仍從几席生潮來半是闌干浸月明艇子搖雙  
雙兩听人家浮玉缸有時暗泊疎簾下見爾科  
頭坐北窻

奉呈孫公中叅

遙遙薊門盤山之阿展彼壯猷勒石孔嘉瀾瀾  
姚江亦涉其波緬彼哲人爰在薜蘿一出處  
曷詠以歌雖則以歌不如晤語登高俯卑寔惟  
延佇以小事大恐不我與旣見則夷匪險匪阻

金陽集 卷三  
曷云有德必宣諸聲何以居業務立其誠雖云  
居矣朝夕遐征乾乾君子亦匪有寧曰秩唯峻  
曰坐罔匹蒼蒼者珮履于石室教行威嚴助此  
陽德德之克明迺用其極

阮太冲移居蓬池

飄蓬本無根池水自有源此水千古流東入梁  
王園園中盛賓客簪裾華且繁遺址竟寂寞徘徊  
誰爲言嗣宗詠厥懷雍容寄慨歎時豈無主  
人顧盼起猜端沉湎不可測禮制越其藩此道

往昔稀後來曷克敦之子善述事事古亦可援  
朝夕居在茲詎無恍惚存倘遇清風發蓬池生  
波瀾

避暑詩

有序

予在棘寺六年再滿人情本倦兼以注秩靡  
所事事時值溽暑罕出應酬日往山寺暫得  
清涼夜月多好命棹而歸方以陳王之賦遠  
謝幽清要諸河朔之杯詎追豪爽惟夫俗可  
暫忘熱免于酷因有吟咏紀興云爾

出太平堤赴考栢臺見荷花初開

趨府雖瞻栢臨流欲採蓮最矜初日麗未散晚  
霞鮮古思湖波外新妝堤路前花開復花落誰  
爲惜年年

赴吏部考業公少宰邀同林考功黃錦衣  
集別墅

但試登臨事依然愜素心鍾山隨地曠柳色入  
灣深葉破重荷出堤連四水侵誰非故鄉客何  
必更抽簪

孔雀菴訪韞輝上人

我欲尋支遁，脩然物外期。  
應門疑隔嶺，入寺識前時。  
林竹山中徑，蓮花石上池。  
所居皆古壁，何處寫新詩。

過烏龍潭吳延美園中

閒雲終日靜，潭水自盈盈。  
頓失炎蒸氣，復聞風雨聲。  
松篁來隔岸，葭菼接孤城。  
飛鳥悠悠去，因之何限情。

與鎧公到永慶寺竹林

十載逢君後孤雲閉石關去冬來寺裏殘雪覆  
蒼山天目名僧遠金陵薄宦閒晨朝一相接避暑  
竹林間

靈谷寺避暑

谷裏亦知暑何如王舍城佇看夏雲靜唯羨夕  
鐘清螢火被金色蒼松停水聲時揮羽扇急未  
得澹無營

塔下看雨

塔角垂雲暝齋時過雨涼林松韻蒼翠石壁洗

苔光草濕僧初定  
泉流鉢自香  
欲因麋鹿伴隨  
意踏長廊

宿普德寺傷懷

客散僧俱寂  
月斜風正來  
蟲聲入衣袂  
涼意出林苔  
縱是邀秋駕  
何能到夜臺  
觀空尚如此  
離思信難裁

毘盧閣納涼

寶閣信巍巍  
窻開俯翠微  
涼風生曠劫  
初地失炎暉  
衆樂松間應  
孤雲壁上歸  
詎須云避世人

跡到來稀

夜汎秦淮

城南行樂地水上列仙家  
玉茗流雲氣瓊笙度月華  
朝痕出乍沒山影近猶賒  
白苧歌方起其如楊柳花

夜過隣園

平易園林好人來未上關  
清池一蟬噪明月幾枝閒  
石隙生秋藟樓中合夜山  
每因思過此纔逐片雲還

夜上雨花臺

爲看夜色曠遂坐此高臺山月當空出江雲入  
樹來梵鐘幾處集塔火百輪開髮髻天花下昔  
賢安在哉

普德寺前松巔夜坐

寂歷寺門徑光明禪壑燈山中自深夜松際對  
高僧徙席添新露垂衣亞古藤不知明月色翻  
逐興無怙

雙桂菴訪竹壑老僧

連朝處淨域未見襍翳塵相過皆禪侶何曾接  
俗人雨添苔色古秋入桂枝新禁足喜間遠誰  
能碍法身

十五夜齋中坐月不得赴孔雀菴之約  
偶爾齋中坐因之失所過月邊秋意早風際竹  
聲多嬾極偏成勝愁深合自歌追尋猶不覺相  
憶定如何

城南古意

白浪隱簾鉤清風聞棹謳看人惟看影同汎不

同舟已出東隣裏難逢南陌頭誰知暮潮水半  
作斷腸流

孫楚酒樓

酒樓如可上日日寄顏顏不隔湖中水還多江  
上山芰荷頻近席楊柳迴臨關倩語軒裳客春  
光奈不還

立秋日到吉祥寺

避暑祇園遍朱明亦漸移竹聲報秋雨蓮性悅  
山池淨侶他方集商飈一日期寧須感搖落自

有長禪枝

靜海寺

有虞允文題名

我聞靜海寺卽寄大江濱  
僧以渡杯識人從解纜  
分城陰稀落日洞口有歸雲  
片石題名在猶思采石勳

盧龍觀

爲獅子山晉易今名

丹梯登陟處高興在秋宵月下  
盧龍塞河邊靈鵲橋  
遂聲江步遠劒氣冶城銷  
王謝畱遺跡風流亦可招

一官同領舊司農三十專城望岱宗秦帝之罍  
曾刻石漢皇梁父自登封湖光夜泊山如鵲海  
氣朝銜樹若龍無那周南留滯者秋深還聽白  
門鐘

王永叔到天界寺同社少集予偶先歸被  
惱以詩作此荅之

被憎歸太早妝閣尚云遲半掩香奩鏡猶然待  
畫眉秋雲澹初發夜雨冷深期詎不來相就從  
渠鑿牖窺

七夕同社邀永叔集城南王氏園中

日暮鵲聲傳城南橋水邊秣陵秋月夜牛女更  
堪憐佳會成千里離心又一年寧逐奔龍軫遽  
爾畏河旋

環海歌

秋來江上居日日思觀海海底蓬萊山所思竟  
何在蓬萊之山杳無根弱水難渡毫毛翻千行  
琪樹瓊樓外却有仙人朝至尊千里萬里不知  
數誰辨秋空浮玉露霞光散盡恒疑曉雲氣堆

成俄作暮暮雲飛去又飛還跨鶴騷驚事事閒  
草變靈芝芝是草山搖波浪浪如山我聞丁南  
羽作畫善着色金生携此圖茫茫成海國所思  
不可見見者盡迷惑晶瑩翠燦直相逼洪波倒  
瀉不可塞席間深淺無人識秋水澹澹流不得

### 竹亭歌

竹亭胡氏稱老翁搆得孤亭亂竹中枝葉垂珠  
元滴露聲音戛玉自搖風子猷諷詠何能已張  
廌逃名未許通任使龍孫長吐節直邀鳳侶下

乘空當年結交五峰子寫竹却稱幽人意不羨  
渭川千戶封不惹瀟湘幾行淚酌酒時浮盞底  
青散帙日沾書上翠但令把臂有高賢喜是平  
生無俗事主人老去亭亦殘有竹只在卷中看  
形骸忽忽扶爲杖鬢髮蕭蕭簪作冠清音久罷  
聞鐘磬素影何曾掃石壇春鶯正想新烟密夜  
雨空懸舊韻寒

峨眉山歌爲松谷上人

峨眉山上月千里若爲看峨眉山上雪萬古逼

人寒山青如黛雪如粉明月鏡中何隱隱雙峰  
縹緲誰畫眉挂在長空不可盡西域雪山絕嶙  
峴此中應見西方人普賢菩薩行具足三千徒  
衆皆應真始信峨眉自惆悵不作巫山神女身  
八十四盤娑羅樹花開如雪復如素一間板屋  
千重嶺正值行人問山路登山路轉難投寺日  
已晚古苔如髮長新松學蓋偃冰窟炊不成雷  
洞眠難穩真僧入定久行脚乞食遠鉢裏龍形  
小崑前鳥聲轉雨氣沉如墨雲光疾如電應有

千化身故作百寶現橋梁宛虹架樓臺疑蜃變  
天竺皆騎象星光盡散燕奕奕九微燈焚焚五  
色線人人爲攝受各各覩顏面欲知色是空色  
卽空中滅世事如幻影詎必歎奇絕奇絕峨眉  
山明月照清徹君來白門秋山月幾圓缺浩浩  
江水流尚帶峨眉雪

題吳文中松島歌爲景陵朱生壽母

海裏看山恒一點山形高兮水近漸中間毫髮  
若可覩正值秋空雲盡歛百層金階歷銀屋無

數瑤函與玉檢崑崙王母下來遊侍立雙嬈皆  
琬琰青鳥不飛漢殿頭人世消息空悠悠但識  
雲霞換朝暮不知樹木成春秋蒼松翠栢一何  
古聳幹垂枝作虬舞鯨魚出入潮水生樹末瀟  
瀟渾過雨微茫只有重波白何處更着遠山碧  
風吹瀑布千尋落直似連峰一片石崔嵬可望  
不可登驂鸞駕鶴有誰能欲向西池觀翠黛何  
如南岳問朱陵

同謝在杭諸子集臧晉叔樓上

息我塵中駕登君池上樓榻居秋寺靜林挂夕  
山幽何事偏深戀相逢盡薄遊塞鴻牕外度清  
響自悠悠

同在杭晉叔子馬招方子及集秦淮水閣  
預把茱萸酌言邀桑梓懽一麾纔罷守十載此  
登壇吳苑砧聲斷秦淮月色寒應知湖海興垂  
白戀漁竿

青溪朝雨

秋夜明將接輕寒最可憐朝聞青溪雨灑向白

門前楊柳已如是鴈鴻何處邊應空戶外屢寧  
問突中煙

中秋桃葉渡雨後見月

明月分秋夜那堪心賞違客中同勝引雨後見  
清輝古渡新流滿殘雲一葉飛舉杯如可問羈  
思自依依

夜過華林園

昔時歌舞地客至問幽叢湖色高城外山容明  
月中林烟平似水沙草卷成蓬鼓角聲方起迢

迢聞朔風

雨集喜晉叔到

促膝風雨會一年能幾回寒林疎牖外雲氣古城隈別日梅花發經秋朔雁催莫言畱滯甚猶得待君來

俞羨長至招同梅子馬陸長康諸德祖洪仲韋林茂之吳明遠集署中共用林字忽聞之子到何事不相臨數載別離久一宵夢想深所招仍勝侶此會是同心譬彼雲中翼天

寒依故林

和羨長僦居之詠

白門願受壘青簡著成編聞說長安紙貴于陽  
羨田已堪慰離索且復得畱連幾夜高樓月還  
過淮水邊

九月朔日過胡彭舉園圃看菊因携數本  
有作二首

欲識野人趣秋光何渺茫出門皆鄭圃佳處卽  
胡床楊柳低垂露芸暉暗避香今年菊花早不

及待重陽

入署有佳致出林高幾層後車同上客前席伴  
孤燈不信移根異還如識面曾悠悠時序裏兩  
載度金陵

邸舍對菊有懷

憶昔卿初歿清明百花朝芍藥伊誰贈楊柳從  
風飄艷陽條已謝素節廼見招未淪金石誓詎  
免薜蘿謠黃菊籬下榮何如容鬢凋但得新人  
賞漫云非昔條故人雲中鵠新人金雀翹雀飛

雖自憐鵠去入九霄

題諸德祖畫

山椒結茅屋中有幽人居但是雲來密定知林  
不疎

秋夜汪仲嘉見過

與君別幾載是我昔之官爲問相思易何如行  
路難白雲來夜靜明月入秋寒籬下黃花發寧  
須九日看

同俞羨長吳非熊林子丘茂之吳明遠廬

山僧過孔雀菴訪韞輝夜宿烏龍潭

荒途十里餘趣與人境背不遠江水上祇在秋  
城內野客時招携山僧日相對竹林隨意入香  
積分食退席踞多夕陽龍潭積烟靄風散波文  
淨月來樹陰碎先此一夕宿以誇登高輩

同焦弱侯臧晉叔俞羨長吳非熊林茂之  
吳明遠到吉祥寺

游入新駐屐太史舊藏書欲識秋光澹惟看物  
候餘竹林旣閒散梅下復何如一自耽幽勝應

知跡不疎

九日霜降烏龍潭登高送尹恒屈方子及  
歸喜謝友可汪仲嘉曾端甫至共賦五  
言排律分得十二文韻

序當青女降酒以白衣分日月斯逢數乾坤一  
論文長房萸乍熟陶令菊猶芬林晚凋容見松  
秋清籟聞素流通淨宇丹壁映斜曛鴻鴈傷羈  
旅羅衣嬌使君登臨應此日聚散總浮雲他歲  
龍山會還思潭水濱

五老峰上人見訪卽別

廬嶽一名僧訪余來金陵寄居茲寺裏相過猶  
甚邇日沒車馬散清言殊未已疎燈映秋籬落  
月覆寒水霜含菊蕊黃露下豆花紫言開五老  
峰手植千株松山居如可遂林下定相逢匡廬  
是我宅金陵但作客欲浮明日杯還戀今夜席  
潯陽九派流石頭一片石其中千里餘悠悠往  
來跡

送尹恒屈奉使歸蜀

雨中官舍閉江上客帆開楚岫青楓遠夔城白  
帝迴秋深塞鴈急日暮峽猿哀萬里橋邊路還  
期使者來

過梅子馬水閣志別二絕

小閣寒初到離魂黯自銷秦淮秋水落楊柳日  
蕭蕭

登高時已散惜別意偏長猶聞不可發風雨後  
重陽

送董考功奉使歸青州

漢庭誰不羨三策在賢科今此都人士皆從水  
鏡過白門送秋盡青土受春多未比投閒客長  
歸戀薜蘿

送子馬少尹之滋陽

淡林落葉已紛紛把酒題詩遠送君魯郡朝趨  
結黃綬秦淮夜別泣羅裙江邊古驛明殘照樹  
裏秋城出暮雲莫道王程可遊行還從朋席促  
離羣

和葉少宰同劉朱二司成登牛首之作

秋色疎林映石關由來天闕異人間言尋澗水  
鐘聲遠靜掩禪房塔影閒牛首峰雲生欲暮蛾  
眉江月出仍彎詞卿唱和皆同調何必藏名在  
碧山

又和遊攝山遇雨不果之作

上宰林泉有夙盟那堪風雨滯孤城山公已盡  
堤頭興江令虛期物外情翠蓋近沾高樹濕玉  
珂遙答晚鐘清未應便作棲霞侶故欲相畱在  
帝京

見雪別鍾山

玄陰已屆候絳樹亦蕭條不覩霜與雪焉識鍾  
山高峰巒稟孤秀信爲江海標今日雨霰下何  
時始復消衆潔之所集粉黛難祿消客子欲有  
行對此中心忉禦寒無重裘茲術烏能搽

畱別同社分韻

勞勞既有亭夢筆復名驛叨陪翰墨場慣上別  
離席一官不稱意五湖是我宅諸子情見念置  
酒臨茲夕雲度青溪青月出白門白彼美不足

戀離思居然劇所願崇風雅勿以山川易務令  
後來者如我懷往昔

龍江關吳非熊林茂之吳明遠宿別共韻  
旅泊猶依寺玄冬欲閉關友朋俱已散之子未  
言還京口明朝渡盧龍此夜山相思值潮水應  
得寄潺湲

眞州過潘穉恭園館

逸士夙命駕千里爲相思矧此江之水與子有  
深期舟途戒云始朋侶未乖離晨起涉波濤揚

帆何其危夜與故人遇中心旋覺怡朔風一何疾忽然自南來尊酒且爲樂詎在亟云歸揆之行與止兩者非所宜但當適志意焉用炳先幾

又

龐公不入城子猷深好竹夫苟固斯誓烏能諧所欲適舍閒以清沿徑紆而曲寒池流夏潦餘花表冬燠智者契在水愚叟名其谷出門逢斯人可以澹榮辱園葵拔已盡灌溉功仍續予懷千里道彼戀一丘足倘從仲尼游老圃請可學

題李季宣閣上

十年相遇長安陌一片燕臺雪花積三載南遷  
到秣陵六月長江吹鬱蒸之南之北無定邊一  
寒一暑成幾年曾爲秦岱峰頭客濟上綰符應  
咫尺恨不齊歌飲魯酒空覩秦松與漢栢此日  
踟躕思海嶠過向邗江問漁釣子爲陶令歸去  
來我廼馮唐甘不調有才固非百里流祇合高  
臥百尺樓山色烟雲何變幻江潮旦莫詎淹畱  
結交四海盡風期舟帆來往密如絲此間但有

金陽集 卷三  
名下士便當來賦樓中詩

宿范東生池上二首

白下思千里吳門到一尋  
預知片榻上緩我故園心  
良夜不復寢清霜時在襟  
除將杯酒外直許是長吟

宴坐已終日其如言別難  
鐘聲來寺靜池水落霜殘  
似有一村遠泠然雙樹寒  
不知歸客棹猶自泊河干

過沈從先

幾度過吳苑情親問所居相依昔日久但覺此時疎踪跡飄蓬外詩篇脫草餘自知苦不足於子意何如

荅別徐仲容

海內論交何屈指姑蘇之地有徐子漫云心許延陵劒須知目攝長安市回頭已是十年餘相見其樂當何如不因下榻爲傾倒好自閉門長著書杯酒寸心猶未竟揮灑長歌出相贈詩中莫漫誇我才別後祇是憂君病須臾不作歲寒

盟客路梅花春又生吳王宮裏連湖白鄧尉山中似雪明君若愛其貞素質相逢堪贈結交行

徐季長邀遊天池舟中阻風作

徐卿邀我遊天池飛廉大叫驅馮夷詎論支公養馬澗難渡吳王闕鴨陂客興何清絕勝緣嗟薄劣錦帆涇裏帆避風百花洲上花飛雪河伯自作意不與海若遊禹王震澤疑未定伍相長江怒尚浮白浪失蛟龍荒臺走麋鹿驛前古道無人行舫傍虛舟漫相觸嬾聞少嬾彈箜篌但

把酒徒汎醺醪君不見野夫興長畏日速就飲  
人家貪信宿

遇徐鳴卿

同門稱我友異地遇夫君十載茲晨接清言到  
夜分武林寒度雪燕市遠看雲何恨新詩興  
人未可聞

初到虎林遇黃貞父貞父卽往吳興

武林相見罷卽欲往吳興兒女方爲累僊舟未  
可登携來天目草削就剡溪藤因識近來趣過

從有老僧

臘月朔日聖果寺訪戒山上人

客裏嘉平始山中歲序殘樹呈羣石巧花雨一  
江寒明月臨禪壑清霜覆戒壇應知西向咲不  
是爲長安

沈伯闡招汎西湖到孤山

歲晏來湖上移舟亦覺閒言從二三子相對一  
孤山祇負青牛去誰令白鶴還今年霜雪早莫  
問六橋灣

貞父自吳興歸見訪

獨客閉門久故人相會賒清晨思返棹昨夜已  
歸家若汎苕溪水應携顧渚茶悠悠何限量及  
爾度年華

過貞父宅

聖主徵蘭署幽人問草堂到家無邑俸引帶有  
書香花墅湖頭出河橋屋裏藏應憐逢叔度能  
使俗情忘

同貞父過定光寺訪明宗上人

林下詢開士蕭然野色闌竹移今日翠松作古  
時寒喧市過成寂貪心捨卽檀勿疑聽法處原  
是散花灘

夜宿顯教寺

有華嚴徑

橋頭山森森柵口水漸漸月沒來時盡霜濃坐  
後添教原分顯密徑自入華嚴今日遊仍息能  
於勝地兼

括蒼太守鄭輅思見訪一訊舊遊

今日軒車過長時旅舍扁行春憶梓里滯雪醉

樟亭客驛君應置仙都予舊經緡雲爲綺障麗  
水作金屏瀑布霜中折石帆風處停清猿括蒼  
嶺白鶴紫芝庭康樂窮幽勝軒轅託杳冥而今  
三易葛猶是一浮萍地豈依王粲人非避管寧  
還從大夫後爲問少微星

遇甬東太守吳季騶訂普陀之遊

故人方領郡五馬去驂驪季子聲名遠吳公治  
行堪樓昏時見旭市曉未開嵐石竇千花出湖  
光兩曜含禁庭移桂密仙墨灑桃酣皓隱商聞

一臣謀越用三鮑郎空納履賀監已抽簪象敎  
應棲島鯨音忽沸潭育王湧塔上大士落迦南  
欲究無生法還從禮佛龕

寄吳允兆

予去年夢到五臺允兆久抱此志其生亦在閩中故端述之

君欲五臺去天花千葉香語時猶恍惚夢裏得  
清涼束嶺疑無地危巔尚逼蒼投身向猊座懸  
額是龍堂喜舍金錢會防過雷雨傍入深惟覺  
暗瞻頂忽生光水滴千尋下天垂一線長自言  
隨北極猶問屬南方何日別茲境此生同故鄉

鴈門徒有雪刷羽不成行

茅孝若餉米戲荅

厭索長安米還來就所親  
龍蛇厄賢士虎豹讓饑人  
好似來蕪甑徒云汲黯薪  
嬾亾那復巧僕病轉堪嗔  
雨雪空飄粉風沙祇作塵  
耻爲安邑累寧問洛陽巡  
乞向謝仁祖求如第五倫  
脩書應有待推食豈無因  
炊異游秦玉糧逾入楚珍  
旣貪充口腹仍免折腰身

過張維成山居夜宿

錢唐門外潮聲喧  
昭慶寺前遊侶繁  
欲向澄湖蕩桂楫  
何如僻徑入桑園  
行行景物轉蕭瑟  
結廬其間爲隱逸  
但聞仲蔚居蓬蒿  
復道龐公挈家室  
四邊野水環旣周  
時時把釣臨清流  
到此詎非剡曲棹  
登來已是雪中樓  
欲知客興何清絕  
雪霽天清氣逾潔  
孤塔真成寶粟堆  
兩峰好作瑤華屑  
層陰背日雪消遲  
却料西溪應倍之言  
尋竹色無窮盡  
忽驚梅蘂紛參差  
穿雲屢度寒林裏  
步月偶聞清梵起  
始知住壑多幽僧  
不

問爲隣者誰氏夜闌託宿向梅花歲暮寧愁天  
一涯宵與世人逐顏色由來眞性重烟霞

同吳德符吳非熊林茂之到雲居寺非熊  
茂之旋寓僧房

天寒吳山杳蒼翠山中還有雲居寺寺在雲關  
盡日幽一往彌令長禪思我聞釋者曰中峰經  
行時暇手栽松松葉松枝漬甘露一卷法華一  
株樹卽今松樹長青青世人誰覓中峰路空門  
未惜人代徂形勝居然但不殊層房各置巖仍

谷半嶺時分江與湖湖水蕭蕭黯無色祇見寒  
波一片白冶游誰復隄上子靜眺故有山中客  
客子來時不欲還真性能隨老衲閒歲除應是  
梅花裏日落徘徊松樹間漫復相逢歌白水由  
來生計在青山

古詩四首茅孝若同賦

淒其歲云暮陽氣將憤盈游子悲物候鬱抑不  
獲征誰爲置言念惟我良友生

舟楫戒已豫悠悠涉川水夜行以繼日人泊我

未已所懷喻饑渴欲以慰吾子

人生如石火知者不再計子思在經綸我則耽  
文菽相見未盡言言之心逾契

我馬駕以南君馬駕以北詎不一心腸而乃異  
行役命運各有時勉之通與塞

立春日過雲居菴訪非熊茂之益公

虎林爲客日驚嶺復春風山色一朝隔梅花兩  
歲通世情紛剪綵禪思合真空應識松扉掩冷  
然清磬中